

北洋官報

目錄

宮門抄
上諭
交旨
奏議◎護直督奏撥接冬季各機關兵米折摺△署江
北提督王奏請獎陸軍學堂任事各員摺
摺片十四則
△廣○諮議局呈一件△吳司詳一件△房山縣稟一件
△肅河縣詳一件
文告三則△蘇補八則△各省七則△各國七則
彙編◎彙編江蘇諮議局議案
圖書◎日本東京櫻切圖

本局第一百二十一期法政學報已出

宮門抄

十一月十八日 度支部 宗人府 正白旗值日 奎俊謝 賞廕生 恩 瑞啟因子以待衛用謝

恩 廷杰謝 賞朝馬 恩 江西知府張其鏞謝 恩 道府劉慶鐘等謝 恩 陳以豐伺

候 召見 召見軍機 張其鏞 陳以豐 沈家本徐謙理藩部各遞封奏一件

上諭

十一月十八日內閣奉

上諭瑞激奏特奏貪劣不職各員一摺江蘇前署吳縣事試用通判王士暄人本無賴性復卑鄙前署吳江縣事候補知縣李國璋佻達性成敗禮蔑法均著即行革職永不叙用前署武進縣事試用通判徐之模遇案索賄怨聲載道前充巡警委員試用知縣程開吳虐待商民幾釀命案試用縣丞馬洪勤前在上海幫審案件營私武斷罔恤商艱均著即行革職調署山陽縣事清河縣知縣陳維漢遇事偏執不洽輿情試用知縣朱慶旦工於趨避難膺民社均著以府經歷縣丞降補海州直隸州知州謝元洪勸捐苛勒輿情未洽著開缺另補掘港營遊擊張熙於千總薛恩賄縱私運米船一案有心袒庇張熙薛恩著一併先行革職澈究審辦該部知道欽此

交 旨

十一月十八日 軍機大臣欽奉

諭旨沈家本奏法律學堂學員畢業屆期應請考驗一摺著依議欽此
諭旨高等檢察廳檢察長徐謙奏編定現行刑律應遵憲政籌備清單預為規畫以便逐漸施行新律一摺著憲政編查館知道欽此

奏議錄要

護理直隸總督崔奏報撥冬季並找支九月分

善陀峪 定東陵八旗官兵米折摺

奏為報撥本年冬季並找支九月分

善陀峪 定東陵八旗新添設後半分官兵米折等銀恭摺仰祈

聖鑒事竊查玉田縣供應

善陀峪 定東陵員役俸餉米折並養育兵丁錢糧等項銀兩向係按

季由司專案詳請題報一面由

東陵承辦事務衙門派員赴司請領散放歷經遵辦在案茲查接管卷內奴

才前在藩司任內詳稱准

東陵承辦事務衙門造冊請領按冊復核應歸玉田縣宣統元年冬季並找支九

月分供應

善陀峪 定東陵八旗新添後半分官兵米折馬乾並養育兵丁錢糧等項共銀二百六十

兩改發八成實銀二百八兩核與歷年成案相符應請在於司庫地糧銀內動撥分開清單詳請核奏併聲明

陵工員役增減無定難以預計應照急需錢糧之例一面具奏一面先行撥給領回散放其實在支領數目統歸

於奏銷案內核實銷算多則解還不敷找給等情前督臣端方未及核辦卸事奴才到任接交覆核無異除清單咨

部外理合恭摺具陳伏乞 皇上聖鑒敕部核覆謹 奏宣統元年十一月十一日奉 硃批該部知道欽此

署理江北提督王士珍奏江北陸軍速成學堂任事各員請獎摺

奏為江北陸軍速成學堂學生畢業經部考驗授職籲懇 天恩准將在堂任事文武各員援案獎叙以示鼓勵

謹繕清單恭摺仰祈 聖鑒事竊江北陸軍速成學堂於光緒三十二年三月間經前提臣劉永慶奏明開辦洎

三十四年十月一律畢業計成就學生一百七十八名當由奴才咨送陸軍部考驗嗣准部咨考列上等學生一百

五十五名中等學生二十三名分擬應補官階具奏奉 旨依議欽遵各在案查此項學堂因江北創練新軍人

才缺乏是以奏請暫設招選合格學生入堂肄業一切課程年限均遵照練兵處速成學堂辦法第一年授軍事普

通學如經史文法地理算學醫學物理測繪兵學操法等項第二年授軍事專門學如步馬砲工輜等隊內堂外場各項學術等課二年期滿該堂總辦等仍欲各生深造復行稟請加課半年畢業後經部考驗列上等者至一百五十五名之多雖學生聰穎有志竟成而該總辦勤事三年督率教練規則之嚴密勸導之周至與各該員教育之認真成就之速效無間寒暑始終其事不無微勞足錄奴才伏查光緒三十年政務處奏定各省武備學堂委員教習保獎章程內開學生畢業成就在六七十人以上咨送到京考驗相符方准將在事人員請獎每案文武併計不得過十六員之數尤爲出力者准照異常勞績酌保二三員其餘均按尋常勞績給獎等因此次江北陸軍速成學堂事同一律且成就學生之數加多一倍有零而所成就之學生皆列上中等第實有成績可考擬請將尤爲出力之總辦直隸儘先補用叅將鄆玉春以副將仍留原省儘先補用其餘在堂出力各員均遵照政務處奏定成案核實人數共保獎三十餘員分別異常尋常勞績繕清單恭呈 御覽合無仰懇 天恩俯准照擬給獎以勵勞勩之處出自 逾格鴻施除查取履歷咨部外所有陸軍速成學堂學生畢業懇將在堂任事文武各員援案獎叙緣由謹繕摺具陳伏乞

皇上聖鑒訓示謹 奏宣統元年十一月十二日奉 硃批該部議奏單併發欽此

謹將江北陸軍速成學堂在事出力人員分別異常尋常援案請獎繕具清單恭呈 御覽 計開 監督留學

日本士官學校畢業生金玉清擬請授副軍校實職 提調藍翎侍衛候選都司黃復元擬請仍歸侍衛班以游擊儘先補用 知縣用山東試用縣丞周崇敬擬請以知縣仍留原省補用 副軍校趙福海高葆恒均擬請升補正

軍校 協軍校何謙吉擬請升補副軍校 縣丞職銜北洋叅謀處武備學堂畢業生倪文翰擬請補授副軍校

以上文武七員係照異常勞績請獎 候選主事劉冠軍擬請以直隸州選用 同知銜揀選知縣顧震福擬請俟

得缺後以直隸州補用 候選縣丞戴文露分省試用縣丞嚴惟性均擬請俟得缺後以知縣補用 副軍校崔懷

清陳夫紀任聯甲均擬請以正軍校記名 協軍校馬樹棠劉炳新唐綸均擬請以副軍校記名 縣丞職銜張葆

琪徐緯中楊永譽張觀濤均擬請以縣丞不論雙單月選用 附生葛惟勤廩生洪錫祐均擬請以縣主簿不論雙

單月選用 鹽大使職銜劉鴻緒擬請以鹽大使不論雙單月選用 鹽經歷職銜高贊元擬請以鹽經歷不論雙

單月選用 拔補外委陳鐘擬請俟得缺後以把總拔補 北洋測繪學堂畢業生耿其駿梁錫爵均擬請以外委拔補 俊秀李志鴻擬請以從九不論雙單月選用 以上文武二十二員係照尋常勞績請獎 宣統元年十一月十二日奉 硃批覽欽此

摺片摘要

吏部奏大學士員缺應否開列請 旨事十一月十六日奉

旨照例開列

又奏查明保獎道員石德芬先行存記請 旨事同日奉

旨依議

又奏議覆程道元等補昌圖府知府等缺事同日奉

旨依議

又奏議覆喇世俊等補慶符縣知縣等缺分別准駁事同日奉

旨依議

又片奏直隸補用道徐華清改獎事同日奉

旨依議

又奏月選佐雜教職等缺事單一件同日奉

旨依議

又奏各省補知縣等缺彙奏事單一件同日奉

旨依議

魯撫孫寶琦奏查明掖縣境內並無匪黨暨已革都司叅款摺同日奉

硃批知道了著即照所陳認真辦理毋忽

理毋忽

又奏飭萊州守鮑祖恩赴任片同日奉

硃批知道了

東督錫良等奏奉省府廳州縣正佐各缺暨旗缺續加津貼立案摺同日奉

硃批度支部知道單併發

又奏前調御史張瑞蔭請回京供職片同日奉

硃批該衙門知道

又奏前調河南南陽令陶炯照請仍回原省供職片同日奉

硃批知道了

又奏准補輯安令徐之慶病故開缺片同日奉

硃批吏部知道

又奏廣甯令侯廷翰請終養片同日奉

硃批吏部知道

公牘錄要

順直諮議局呈 護督憲議決交議各案暨申覆諮詢各案文

爲呈覆事案查本局於宣統元年九月初一日奉 前督部堂端札開照得諮議局爲採取輿論之地業經照章選舉合格議員經本部堂先期召集到津定於九月初一日舉行第一次通常會所有應議事件自應照章辦理查局章第二十一條內開諮議局應辦事件共十二款第二十五條內開第二十一條所開第一至第七各款議案應由督撫先期起草於開會時提議除第二三款外諮議局亦得自行草具議案等因惟本年未及試辦預算決算之期除第二三款無從提議外其餘事件應擇要陸續提議茲將議案三件諮詢事宜二件分別編號另單抄錄先行交議爲此合行札飭札到該局即便照章辦理凡經議決之件並仰即行呈候裁奪以便遇有應行覆議事件得於會期內再行交議此札計發議案三件諮詢二件并附摺表各等因奉此遵即編入議事日表公同討論切實研究總期實際可以推行而法律不至違碍庶不負 朝廷諄諄求治之至意況現值預備立憲時代百廢俱舉庶政待興必設施力求改良方上下日形親密茲承交議及諮詢各件誠爲當務之急但其中辦法有未便遽事更張者有尙宜略加修正者反覆研求期臻完備業於會期之內一律議決遵查 奏定諮議局章程第二十二條內開諮議局議定可行事件呈候督撫公布施行第二十三條內開諮議局議定不可行事件得呈請督撫更正施行各等語前項案件既經議決自應遵章辦理除將各原案分別說明理由加具按語另摺繕呈外所有本局前奉交議諮詢各案公同議決及申覆各緣由理合呈請 護督部堂查核照章公布施行實爲德便爲此備文具呈伏乞 照呈施行須至呈者 計呈送議決交議四十六廳州縣糧租案清摺一扣 議決交議調查戶口規則案清摺一扣 議決交議籌設簡易識字學塾案清摺一扣 申覆整頓巡警案清摺一扣 申覆清理差徭案清摺一扣 (容陸續編入調查類)

臬司詳各屬審辦命盜等案禁用非刑文並批

爲詳明事照得各屬審辦命盜等案擅用非刑例應叅處 功令何等森嚴現值禁止刑訊改良裁判之際尤宜實力遵行以重刑章而恤民命乃近有贊皇縣王令審訊續備兵廳堂等被張二派誣扳爲盜一案該令率將廳堂等坐老虎橈以及上架挂桿踏槓任用種種非刑威逼認供由陸軍兵備處第四鎮統制委員查明詳奉 前憲台行經本司提省審辦似此擅用非刑恐各處亦所不免亟應通飭各屬一體禁毀並由本管道府廳州隨時查察如

敢故違卽行據實從嚴揭拏庶賦性殘酷者知所儆懼而民命不致死於非刑矣除分別移行一體遵照外擬合詳請 憲台查核爲此備由具册伏乞 照詳施行

護督憲崔 批來牘閱悉此覆

房山縣孫令續稟設立巡警教練所暨開辦日期文並批

敬稟者竊維巡警爲內治要政舉凡弭盜安良排難解紛稽查奸宄保衛閭閻胥賴於此尤與預備立憲籌辦自治有密切之關係凡充膺巡警者苟非平日熟諳警章學有專門不足以資勝任而就範圍自非教練於平日斷難得力於臨時茲查卑縣城鄉原有巡警六十名卑職到任後復勸辦三十餘名雖經陸續調赴總局隨時傳習究與定章微有不符現與該局董蘇振譽等悉心籌議在總局內附設巡警教練所一處定額四十名以三個月爲畢業俟頭班畢業後再行調集未經教練之各巡警入所照章教練其教習則仍以總局教員孫守禮兼充分班授以警察實務巡警須知刑事警察大清違警律兵式操法等項俾各巡警耳濡目染日就範圍警政前途不無裨益並派總局巡長徐平兼充該所書記以之管理登記賬簿及填寫表格等事與教員各支原有薪水不另開薪以節糜費又設夫役一名聽候使令灑掃等事月給工食錢一吊至巡警飯食軍裝等費概由各該村自行籌備此外一切經費統歸巡警總局酌予提撥不使爲難定於十月十六日開辦如有未盡事宜仍隨時會商稟辦務使警學日昌警兵得用以期仰副 憲台整頓警政注重地面之至意除由卑職督同切實辦理不敢始勤終懈外所有卑縣添募巡警並設立巡警教練所分班教練暨開辦日期各緣由理合稟請 大帥查核立案肅此具稟恭請 勛安伏乞

垂鑒

護督憲崔 批據稟已悉仰警務處轉飭該縣督同教員切實訓練以儲警材並飭候 府尹批示繳

甯河縣張令繼信詳開辦蘆台自治研究所文並批

爲詳報事案查前蒙 憲台通飭各屬城鄉地方自治應先設立自治研究所等因遵照在案當經邀同紳董並自治學員在於本城設立自治研究所一處曾將開辦簡章並籌撥經費各緣由先後詳報在案茲查卑縣所屬之蘆台鎮係商務繁盛之處自宜遵章設立以期造就自治人材卷查上年卑職初次任內曾據該鎮治畢業增生苗紳

心蘭稟請籌設自治研究所到縣當批准飭令妥籌經費議定開辦章程再行稟報核詳在案嗣據該紳以竈首吳鳳藻竈戶李芳園等倡捐並與衆竈公同商酌先由賣硝項下每十石籌大洋一角五分賣油項下每塊籌大洋一角作爲蘆台鎮自治研究所常年經費並有該鎮鮮貨經紀情願每年捐助洋銀九十元以及查追充公之觀音堂廟產房地均歸該所經費雖不充足而當此自治吃緊之際惟有在事各員篤盡義務力求撙節並擬定規則稟請先行開辦前來卑前縣孔令未及核辦卸事卑職回任復經提倡飭令延聘教員招生聽講以便詳報開辦去後茲據該所發起人自治畢業增生苗心蘭等具稟以擬定蘆台鎮自治研究所業已遵章在該鎮觀音堂廟內設立籌集經費延訂教員招選司事夫役及合格聽講各員業經滿額擬於十月初六日開辦並呈該所講堂齋舍等規則辦事聽聽各員名册請出示轉詳立案等情據此除出示曉諭外卑職卽於是日親詣該所查勘佈置一切尙稱完備隨同衆演說自治宗旨並發明該紳苗心蘭等籌款創辦經營已歷年餘始得落成誠屬克盡自治義務從此衆紳推行有效立憲實基於此覆查所訂規則課程一切悉遵定章亦無違碍之處除由卑職隨時前往稽察外所有卑縣屬之蘆台鎮自治研究所開辦日期理合將辦事各員銜名並員役車馬薪工等費同聽講各員姓名以及所訂規則課程分別開具清單具文詳報 憲台查核立案除徑報 尹憲外爲此備由繕册具呈伏乞 照詳施行須至册者

護督憲崔 批詳摺均悉仰自治總局核飭遵照具覆繳

文告錄要

督憲批示錄要○津海關道詳馬家口法人佔地案請飭岳昭燭接辦並派廖世功幫辦由 批據詳已悉候札飭岳道昭燭會同該道安速辦結至派廖令世功幫同辦理仰由該道札飭遵照繳○又稟法副領事蘭必思請賞寶星由 批據稟已悉仰候彙案附 奏另檄行知此繳

藩台牌示○大名縣楊鴻業丁憂遺缺擬以沿河候補知縣章承績請補○吳橋縣張壽齡請開缺免補直隸州以知府仍留原省補用遺缺擬以卽用知縣黃純垓請補○圍場同知司獄劉端培開缺留熟補用遺缺以景州龍華鎮巡檢韓述文調補○撫甯縣訓導王世彥病故遺缺委試用教諭何雲峯署理○完縣訓導馬鍾魁丁憂遺

缺委試用訓導石夢庚署理○樂城縣典史王樹齡咨斥革遺缺委候補典史朱學德署理
保定商務總會批示○正定府鴻興永商人馮樹泉控望都縣城內車舖李洛應負欠不還一案 批呈悉候移望
都縣傳案追究此批

畿輔近事

順直諮議局議案凡例○一本案照諮議局章程共分三種用專摺繕寫蓋用關防而另備公文呈送 一議決案
面署順直諮議局議決案 內署議決某事案 起用案查案照等字或單用案字 未用爲此公同議決呈候
公布施行 如議定不可行者用呈候更正施行 一申覆案 面署順直諮議局申覆案 內署申覆某事案
起用與議決案同 未用爲此公同議覆呈候裁奪施行 一陳請案 面署順直諮議局陳請案 內署陳
請某事案 起用與前同 未用爲此公同會議陳請裁奪施行

直隸出品協會致商會總理函○出品協會致商會總理王竹林觀察函云敬啓者九月間奉到前督憲端札開據
貴會稟設直隸贊助出品有限公司籌集股本十萬元官商分認切實籌辦各等因並奉頒發簡章循誦之餘仰
見我公宏謨碩畫願力彌宏公益梓情兩全其美欽佩莫名惟思此舉造端固大得官商和衷共濟組織自易爲
功敝會爲大局起見敢不勉力分籌稍資補助現在午帥雖去 筱帥將來蕭規曹隨無虞阻闕敝處展覽會開
會已閱半月而各處陸續運品缺者正多轉瞬來年爲期已促彌望貴公司早日成立得以兼收並蓄補助成功
此固兩帥所期望而亦直省實業界所同爲鼓舞者也至於公司中用人大端統候卓裁定奪敝會祇詳請派員
稽查幫同核款總以抱定貴會所稟官商聯絡款不虛糜八字爲宗旨尙希執事統籌全局終始維持將貴公司
何時開辦及一切辦理情形先行賜示至深盼切

議事會議決補助小學款目○天津議事會移知董事會議決補助民立男女各小學堂銀洋數目如下 一穆家
莊民立第八小學堂該堂設立兩等學生共一百八人每年用款約估一千零七十七元尙虧款三百五十元
成績既優經費尤省足見籌畫精詳辦事得法令人欽佩應如數補助洋三百五十元 一大直沽民立第六小
學堂查該堂設立兩等學生共一百四十三人每年用款約估三千一百八十元尙虧款五百餘元成績雖最優

然經費稍鉅酌補助洋三百元以期節儉 一河東民立第一女學堂查該堂分設兩等學生五十一人用款約估一千三百九十元尙虧款三百六十元經費似較男學稍鉅然當女學萌芽時代自應極力提倡補助洋二百八十元以期進步 一錦衣衛橋民立五十四小學堂查該堂只設初等學生六十五人用款約估六百元經費既不甚多而成績亦稱優等足見辦事苦心依勸學所報告如數補助洋二百五十元並撥給該火神廟大殿及廟後菜園作爲擴充齋舍操場之用 一買家沽道民立二十四小學堂查該堂只設初等學生四十七人經費約估七百九十餘元尙虧洋四百三十元成績雖優經費過鉅應補助洋一百九十元以節糜費再籌款三項第一第二已入自治經費項下第三項所云事事仰賴紳董恐不勝繁瑣窒礙難行未便照准 一灰堆四十二小學堂查該堂只設初等學生三十八人經費約估五百五十餘元尙虧洋二百八十元按學生人數應歸併一班而該堂分設兩班故用款較費酌助洋一百五十元以免虧耗 一范家莊公立初等小學堂查該堂只設初等學生二十八人預估用款三百四十餘元尙虧洋一百八十餘元缺款無多而馬集斗秤等項尙能籌集補助洋一百元似可敷用 一雙港民立三十六小學堂查該堂只設初等學生三十五人預估經費洋九百四十五元尙虧洋二百五十元按該堂出款雜項及獎勵金糜費頗多略爲節儉可不補助但學生成績尙優酌補助洋八十元以資提倡 以上共洋一千七百元

(未完)

移·知補選議員到會○天津議事會移天津縣文云爲移知事案查議事會補行會員選舉一案業蒙縣台臨場監視行正式選舉以花翎候選員外郎楊希曾爲當選茲據該會員來函承認到會視事相應備文移請縣台查照備案實爲公便須至移者

申·報議員退職事○天津議事會申報各憲云爲申報事案查天津縣董事會於光緒三十四年七月成立所有副會長會員銜名早經備文申請憲台查照在案茲有會員陳自彬被人指摘經董事會副會長查明實係因循貽誤並辦事近無能力遂經議事會開會公議決令退職當於本月二十四日照章補行選舉公同舉定花翎候選員外郎楊希曾爲會員業據該會員來函承認到會視事所有會員陳自彬照章議令退職及照章補選各緣由理合備文申請憲台查核備案實爲公便

天津縣議事會議覆說帖○王從周等說帖爲宜講醫藥事 議覆說帖閱悉候董事會覆到再爲核議此覆○高世昌爲設灶水煮死畜臭氣有碍衛生事 議覆說帖閱悉候移請南段巡警局令伊遷移此覆○姜徐氏說帖爲陳明建議秉公調查分別是否事 議覆說帖閱悉請將紅契送會審察再爲核議此覆○祁張氏說帖爲欺凌嫡室冤抑難伸懇恩轉請地方審判廳從嚴懲治事 議覆說帖閱悉事已成訟本會未便干涉此覆○龐家嘴村正龐振邦說帖爲現屆嚴冬災民愈苦懇恩再賜議詳賑恤以延蟻命事 議覆說帖閱悉候據情移請賑撫局核辦此覆

論常駐議員職權書紀略○順直諮議局副議長王君振遠以諮議局常駐議員照憲政編查館電咨無議決督撫交議之權特致書上海聯合會請其協謀挽救之法題目論常駐議員職權書昨承抄示原稿茲特紀其大概可

以略見一斑矣
展覽進行會瑣記○直隸出品協會自月朔開幕展覽公園拋球場前操場一片最爲廣闊當時已有賣藝變戲法看西洋景演留聲機器各雜劇近日以來又新添吹會舞獅走繩諸戲走繩之法用長索繫其兩端植諸地上令十數齡童子行走繩上往來奔縱騰躍或立或坐或跪或臥瞬息百變跳擲萬狀或手持長竿亂舞良久乃下神色不變亦可謂精於技矣又十六日爲女賓參觀之期是日和暖無風共收入場券一萬八千八百三十紙

各省近事

政治

籌辦各級審判廳○汴撫對於籌辦審判廳一事頗爲注意日前傳見兩司會議此事並將此案移送諮議局會議刻聞准於宣統二年試辦宣統四年一律成立惟目下人材缺乏尙須亟爲設法一俟籌議妥洽卽爲招考云

諮議局呈報推補議員○浙江諮議局日前具呈撫院略謂資政院議員應選人員陳敬第邵義余鏡清鄭際平王佐王廷揚陶葆霖其諮議局議員缺額人數照章應以候補議員補入查杭州候補議員前列二名陸元鼎孫樹禮寧波候補議員前列一名張美翊台州候補議員前列一名楊晨金華候補議員前列一名周炳文紹興候補議員前列一名阮性存嘉興候補議員前列一名吳慶廷應作諮議局正額議員補定至局中常駐議員應選資

政院議員者余鏡清王廷揚陶保霖三人照章以候補常駐前列議員顧榮第鄭永禧褚輔成三人補入等情增中丞當即分咨資政院民政部查照一面札行藩司趕將前准民政部電查兩次議員冊內胡仁壽張元濟二名究係因何未補刻日電催查復詳辦

湘省複選資政院議員○湖南諮議局各議員互選資政院議員五名加倍選出十員姓名票數現經岑中丞複選五人選定羅傑湯魯璠馮錫仁唐右楨向燾等五員已經列榜發下到局各議員以向燾一名雖得票較多究係第三次選出似不應提前應選遂據情呈請撫台更正卒經岑中丞將向燾一名開除仍按次以易宗夔補入各議員又以馮錫仁原係本局副議長茲被選為資政院議員所遺副議長一席亦經投票互選以胡璧最佔多數遂以補充

學務

移請清查各區私塾○江蘇鎮江私塾改良總會近奉到如臬教育會勸議所移咨大致謂部章載私塾與學校並行不悖賢愚混雜非切實調查不足以辨別優劣敝會辦法係凡教授改良者給予札諭酌改為初等小學次者傳集考試如文理不通僅識字無多者即勒令停止以免誤人子弟妨害學務至表式敝處係分地址各學生分數課本教法房屋束修等項貴會考驗學生此番進行殊深佩仰此後應由貴會稟准地方有司會同頒給調查札諭庶調查員有所遵循而亦不致橫生阻力云現該會仍派總查李君即日分往各區詳查矣

發起教育品展覽會○皖省紳學界於前月三十日假教育總會開會提議組織安徽教育品展覽會吳棣軒提學及紳學界領袖均蒞會決定以安慶府中學堂為會所舉劉君季威及某君為經理人經費除學務公所捐助百元外餘由高等師範各學堂擔任將來教育之成績必有可觀矣

實業

魯省物產之特色○山東出品協會曾派員分往各屬調查現已陸續回省其表冊所列大宗物品以帽辦繭絲二者為最其他特別各種如蓬萊之紅寶石鮮艷如石榴瑩澈如雲母良可珍玩萊陽魚石之大者居然鱗鱗逼肖姿態生動其最佳者片石即值數百金而尤奇者則朝城縣之石燕產於縣城西北隅之古井中當陰雨之時恒

有飛出墮地者旋化爲石作蟹青色土人謂足供催生之用既非礦質又非動物天地生物不測洵足供博物學家之研究也

鑒業公司開股東會○江西鑒業公司於上月二十二日午後開股東大會借城內韓家巷農工商局爲會場蘇地各紳商及豫省旅蘇同人到者甚衆先由幹事員宣佈開會宗旨次由徐少芹施伯庵二君報告前赴公司調查情形末由張觀察等諸來賓相繼登壇演說該公司組織之完善並營業之發達衆皆稱善

各國新聞

法外部演說外交政策○路透電云法外部大臣比昌氏在內閣演說法國外交政策謂俄法兩國邦交并未見格外親密然英俄兩國睦誼增加實以英法兩國邦交親密爲基礎至俄義兩國邦交自近日俄皇與義王會晤後可決其益加親密又法國與德國對於摩洛哥問題有意見之處現已解釋兩國已訂協約如此則歐洲外交界之現情必更有進步現查兩國所訂協約係嚴守在摩國中立政策與巴克達鐵路并奧國問題決無關係至於議定克里德島政策尙非其時若時機一至列強必會同協議以保利權

查獲被竊之海軍圖式○路透電云英國海軍製造艦艇圖式被人竊去現在納洛敦氏屋內搜出造艦圖式五張并將納氏被獲納氏係魚雷艇威爾南號畫工并搜查納氏寓所又尋獲圖式八張繪工甚爲優美

英國前相病愈○路透電云英國前任首相包洛孚氏日前患病現已喜占勿藥

土耳其駐英公使回國○柏林電云土耳其國駐英公使德福克氏因土內閣總理大臣允許英國在泰克利司與歐福里斯兩河航權致起衝突一案擬回土京了結此事

日韓無綫電之交通○京津太晤士報云日美兩國前提議由日本至檀香山安設無綫電報以便傳遞消息現已作爲罷論聞由日本至韓國所設之無綫電現已交通

英國武員之更調○倫敦電云英政府現調駐南非洲陸軍總司令官米塞恩氏充駐納達爾(非洲英屬)總督以繼納森氏之任聞納氏現在補授郵政大臣

美國探險家之供狀○倫敦電云美國探險家庫克氏現在自認并未行抵北極其一切報告自始至終均係捏造

信於人設無逾量之要素安知不洋藥盡去土藥盛行如彩票之星羅棋布乎然則彩票一日不禁非特國民之生計因此受莫大影響而外交上之失信此亦顯著之一端也抑吾亦知財政之困難今日已達於極點矣路也礦務也災荒也無一事不需財無一事不取民之財值此羅雀掘鼠之秋姑爲積黍成邱之策似彩票一法上有益於國下不戾夫民急則治標猶不得謂爲非計雖然天下事必探乎盈虛消息之原而後能操縱由己不致飲鴆以自斃試問今日之中國固處於若何之地位耶民力窮於內洋債逼於外國民營利之能力愈薄弱而非分之慾望愈熾不爲之開其源節其流導之於經濟競爭之途而徒以不努力之大利餌之其有不膠膠擾擾輟業而嬉者幾希試觀小呂宋一賭國也其彩票之盛著聞於環球卒一變而爲美人殖民地前車之覆後車之戒應請行政長官將現行之各種彩票奏明禁革以後各省商民不得藉詞報効再請包辦彩票庶我國民皆趨於正當之營業而不至沈溺於大博場也是否有當惟諸君子其度爲幸

一 治淮議案第三理由書 第一第二理由書對於治淮方略猶是討論之意見其實行之方法尙未研定茲特據各種之理由次第說明之淮水爲關於水利之河渠非專備洩水之河渠治之者宜以能洩能蓄爲主義蓄之法則因地形之便利分爲三層第一層以高堰以南堤工承之第二層以運河東堤承之第三層東至范堤則蓄水之意爲輕而防捍海潮之意爲重此舊時之方略也今高堰以南之堤岸庸闊鞏固無事籌畫運河東堤爲下河屏蔽亟宜堅築酌建石堤是爲要著而培厚西堤則與之相連其修築范堤尙可從緩是爲第一方法 堤岸堅實而其用在虛是有閘壩洪湖以東舊有五壩今每歲必開者其三壩是爲蔣壩又曰三河此外可開通者尙有引河幾道當湖水盛漲之時凡此引河能否資以宣洩貴在審查運河東堤除原有閘洞外亦設有五壩近時當開者惟車南新三壩其金門約共寬一百八十丈開一二壩下河卽受災害從節宜便利著想則莫如以閘代壩於車南新三壩之兩端各建一閘計增石閘六於寶應境內酌增四閘界首以下酌增二閘邵伯以上酌增二閘其金門共闊約在二十丈以內此新設之閘早開一月則可保一壩早開兩月則可保兩壩保壩之期爲十日開壩則下河民田所收穫者可增多十之三四每畝多穫一石其值逾千萬而逐日容受各閘之水漸由通海諸閘放出可以無慮而通海諸閘亦須詳加測量以漸施工作是爲第二方法 蔣壩不開東堤諸閘嚴閉洪湖

之水由高良澗以抵清口下天妃閘而南行南由瓜洲入江東下六閘而至運鹽河其北向之途以孔家涵爲第一門戶洩水最多由是而東以北向之途多而南向出江之途少故下河水勢皆由興化東臺斜趨鹽城以入海就目前利害而論止由清河而南大濬運河至瓜口爲止次宜濬治高良澗東北之鹽河以迄清口而下所有河道淤墊之處亦宜擇段疏通凡此河渠皆因其故道酌加挑濬所費較輕是爲第三方法 運河以東缺水之時必開蔣壩引用洪湖之水洪湖實淮揚兩郡之命脉而當豫皖兩省暴雨水下注實賴洪湖爲之容納徐屬之南境淮屬之西境亦利賴之洪湖之於淮水實有功而無過今但咎洪湖之盛漲不咎盛漲之由來欲填塞斯湖以消水患設大雨時行水勢橫流必且無從容納宿遷縣境因駱馬湖淤塞頻年疊遭水患是其明證故洪澤湖非濬不可數萬頃面積之湖欲以人力濬治誠不能大事擴張所謂濬湖者乃疏治通湖之引河及新淤之有礙水道者其於漲灘則挑取近水之土加諸近岸之區俾湖心較深以免接漲是爲第四方法 歸江七壩爲宣洩淮水之捷徑賴以減除東堤之危險查董石廖三溝與芒稻人字兩河以及沙河均甚寬廣惟淤淺之患在所難免凡此河道在夏秋盛漲之際皆爲導淮入江之途徑今欲刻期並舉大事疏通雖無此財力但詳加測勘酌去阻礙亦宜注意是爲第五方法依上列方法分畫期限以爲之第一期治運河及東西兩堤第二期濬洪澤湖及高良澗第三期修通海諸閘濬通江諸河及下河重要之河渠其之短長視財力之優絀以爲準再嚴定閘壩啓閉之法通海諸閘視潮汐之漲落定之下河水勢宜洩不及漲至若干尺則暫閉東堤諸閘運河水勢盛漲至若干尺則開通江諸壩再漲至若干尺始酌開東堤諸壩舊制之不合現狀者革之 第一期工事以石堤爲最重堤身以紅石爲之高一丈八丈以上石寬厚八寸疊砌二十三層砌法一直一橫每丈須加三計算並琢治之工寬算每石一丈約在二元以外每里條石之價約須八千元內鑲碎石築厚五尺高一丈四尺每丈加碎石六方每里碎石價約五千元木椿礮工每里約五千元翻土築造之費每里約二千元此外應用石筍三合土或塞門德土並一切零星需用之物約每里再加六千元由界首至邵伯計一百二十里約須三百萬元此改築石堤之計畫也 建閘十四座金門約深二丈寬一丈燕翅每面約二丈閘高二丈以寬厚一尺青石疊成一橫一直以加四計算每閘一座需青石一百七十丈加填碎石及塞門德土下鋪石底每座須洋六千元壩口之閘六座一面須




圖 切 堀 京 東 本 日

枯骨回春

大連市華商公議會書記患胸膈疼痛吐血各症服韋廉士大醫生紅色補丸而得身體強健有力茲承其來函云
 余姓鑾名寶廷奉天省金州西山凌水河子人也現年四十六歲幼多疾病常患咳嗽先父因病溺愛遂致廢讀於
 二十二歲投効殺軍受知前故直隸提督馬玉崑列為幕友光緒甲午年中日之役戰於韓之平壤大同江岸鏖戰
 失機左腿誤中流彈流血斗餘大受窘迫兼之體本虧弱漸致紅虛癆十餘年形銷骨立否泰靡常戊申之歲勉應
 大連市小崗子華商公議會書記之職至秋十月突覺心跳神迷頭暈目眩飲食不進漸至夜睡不甯台眼驚痛心
 怖氣促狀類怔忡種種異症莫可言喻曾服方藥百有餘帖毫無進益自維受病日深難望安痊悲悶中檢閱盛京



新報載有韋廉士大醫生紅色補丸療治各病奇驗異常因即購服一瓶越
 十餘日覺有轉機爰乃接服三瓶沉痾若失諸疾頓消余深感○廉士大醫
 生紅色補丸活我之意莫可圖報敬擬枯骨回春四字用彰大德以表謝忱
 藥寶廷頓首 藥君寶廷體弱身病皆因其血衰薄之故無力使其康健
 也據其書中所述韋廉士大醫生紅色補丸使其有稠紅有力之新血復其
 精力而得強壯然韋廉士大醫生紅色補丸常以達入血中之法醫治天下
 諸病如 腦力衰弱 腎虧疲瘵 腰骨疼痛 氣喘咳嗽 氣管發炎 諸虛
 百損 少年虧喪 陽萎不舉 左癱右瘓 腳氣衝心 肝經各病 諸
 之奇效 風溼骨痛 腎虧疲瘵 腰骨疼痛 氣喘咳嗽 氣管發炎 諸虛
 痛頭暈 乾溼癬癩 癩癧疔疹 皮膚諸症 已不知凡幾矣是丸又為醫

治幼女壯婦經水不調一切各症之良藥其奏效之神速固非他種補藥所可望其項背也 韋廉士大醫生紅色
 補丸中國各處商店藥局凡經售西藥之處均有出售或直向上海九江路B字第八號韋廉士醫生藥局中國總
 發行處購買亦可 價銀每六瓶八元 每一瓶大洋一元五角 遠近郵費一律不取
 謹告購藥諸君能療疾病者係真正韋廉士大醫生紅色補丸並非若市上所售影射漁利之紅血紅衣等丸也謹
 防假冒勿為所悞

上海九江路B字第八號韋廉士醫生藥局啟

商務印書館出版各書上海總發行所 分館 發售

欽定大清會典事例全書 會典 版式大小謹遵 商務印書館恭印

是書前由敝館承印伏讀外務部 進呈原奏有印造尙屬精工等語查王公京外大臣得蒙 頒賜是書者僅一百三十八部敝館曾於去年縮印發售旬月間已疊再版顧海內宏達深以未見原書爲憾且原書有圖十二函亦以過於精細未能縮印致付闕如茲特再行攝影一切版式圖畫悉如原書刻已印成樣本欲閱者函示即寄○一全書四百九十四冊分裝八十二函計會典六函事例六十四函圖志函○一定額二百部售完不再印○一定價規銀四百兩預約者減爲二百五十兩○一預約以本年九月底爲限先付規銀五十兩○一本年內先出會典六函圖十二函宣統二年四月續出事例六十四函全書告竣○一遠地郵費運費概照實計○一詳細章程具載樣本中○一發售預約券處在上海本館總發行所各省分館

新譯日本議會紀事全編出版

陽湖孟森校訂無錫蔡文森侯官王我臧輯譯 是書自日本開國會始至今年止凡二十五期 其初幾無故事朝野皆奉一憲政爲準繩爲國

法律之改訂或以爭執爲攻錯或以和衷爲救濟政府之待遇議會與議會之對付政府皆新立議會者必經之層折吾國現狀與此適合不但行政官與議員急宜人手一編以資觸發無論何人皆宜循覽庶知人民參政之實際全書分訂四冊定價一元五角茲因諮議局不日開辦趕將前二冊先行出版後二冊七月出版預定者實價一元收到書價後即交前二冊並付收條俟後二冊出版時憑條取書特此預告外埠郵費照加

天津分館開設 河北大胡同 電話五百二十六號

天津商務總會代收兩湖吉林水災賑款數目及各善士銜名第十二 次報告

張竹坡代募第三百七十五號册共助洋一百十六元 田煥亭 陳藹士 張葆齋 陸秀山 沈慕韓各助洋
十元 張毅若八元 童華亭 汪幼龍 王幼甫 李露生 譚利賓 唐俊夫 張晉二各助洋五元 章靜
軒 陳藥山 張蘭生 慰痴生 段谷香各助洋三元 孔菊仙 喬景周 張子植 王佩卿 楊恩培 胡
棟生各助洋一元 ○清河縣鹽總店代募第一百十一號册共助洋十元 春暉鹽店助洋四元 何梓樑 劉靜
齋 聚泉號各助洋一元 郭秋舫 郭聯三 王蓋臣 董獻廷 許振德 王麟瑞各助洋五角 ○清河縣正
堂代募第一百十號册共助洋二十五元銀十兩去平色銀三錢八分實收合津公砵銀九兩六錢二分 署理清
河縣知縣文元助銀十兩去色三錢八分實合津公砵銀九兩六錢二分 清河縣汛司廳李正寅 清河縣縣丞
陳毓英 清河縣民人趙一士各助洋二元 清河縣典史沈韻梅助洋四元 勸學總董劉喜喆助洋一元 清
河縣民人助洋十元 賤席吳之明 城內無名氏各助洋六角 油坊汛王永仁助洋三角 總警局安際雲
巡官徐重文 油坊局巡官劉之春 小屯局巡官劉書酉 辛集局巡官陰自新各助洋五角 ○曲陽縣代募第
九十九號册共助洋三十七元 曲陽縣鄭十元 范韭龔 彭厚菴 谷儒珍各助洋二元 盛子服 沈倉山
曲陽汛蕭 曲陽巡官時宜 官錢局 天福當田悅卿 陳貺周 彭浩吾 楊省三 田銘 田點梅各助
洋一元 甄滌齋 陳錫恩共助洋一元 張文郁 李國華共助洋一元 甄曉滄 趙霄九共助洋一元 彭
予九 劉範卿共助洋一元 彭崇甫 楊熙亭共助洋一元 郭雲軒 高甲三 田漢卿共助洋一元 張宗
韓 焦冀生 葛梅卿 盧錦春 周普澤 彭蕊馥共助洋二元 ○林西縣正堂代募第二百三十一號册試辦
林西縣事揀發知縣國仁泰二十元 錦生潤代交合津公砵化寶銀十四兩四錢 ○肅甯縣鹽總店代募第三十三
號册共助洋十元 集義生鹽店 鹽店同人 福承鹽店 福承鹽店同人各助洋二元 忠恕堂張 各鎮鹽
店各助洋一元 ○固安縣代募第二百八十一號册共助洋十四元 謙吉鹽總店四元 高椿軒 郝級秋 王
益甫 高祝軒 李子炎山東濟甯人現居固安縣 陳誠齋 楊鳳巖 馬莊鹽店 牛駝鹽店各助洋一元
劉雲嵐 楊秋生各助洋五角 ○以上統共收洋二百二十二元又共收合津公砵化寶銀二十四兩二分

天津救急善會具

新 啟 告廣司公限有灰洋



啟者本公司係承受唐山洋灰公司老廠另購外洋最新式機器旋磨等創設新廠自丁未臘月新廠開機以來出貨加增行銷愈廣灰質經本廠西洋化驗師悉心研究精益求精會寄由德國國家栢林及日本關東都督府各化驗所驗得動力堅力及凝結時刻灰之粗細均合要工所用其成色與外洋最高之貨相等尚有機器製造之紅磚花磚洋灰瓦水溝管矸子土等項無論躉零交易均可本公司總理處設在天津海大道英租界並在北京奉天大連烟台牛莊青島上海漢口南京鎮江各埠均設有經售處如蒙賜訂大批價值從廉交貨不悞期限所有洋灰及各種磚瓦等件重量式樣大瓶用法另刊有華洋文廣告 光顧諸君請向本公司索閱面議一切可也

德律風一千三百零九號

利文洋

大小皮包法國洋號又新到轉盤換調器壓八音盒價值格外從廉仕宦官商光顧者請移玉紫竹林法租界本行面議可也

本行開設天津上海香港志呢華參處均設立有年諸班貨物由外洋本機器廠自造磁蘭洋鐘皮套鐘天文坐卦等鐘以及金銀夾金鋼鋼等表約有二百餘宗並各樣表練金鐘珠寶鑽石戒指耳墜鑲子表鑲大小八音盒並留聲語匣單雙補千里眼磁蘭磨花穿衣鏡妝梳洋鏡

本行主人啟

瑞林祥元記 綢緞洋貨莊

本號開設北京前門外鮮魚口天津估依街中間路北山東濟南府院西路北自置綢緞紗羅頭繡純蟒洋貨布疋各色喇哩厚呢京廣什貨俱全貨高價廉劃一不二後廳內專售線貨織絨袍料衣包被套口袋線毯毛毯零貨均照行價發兌中外紳商賜顧移玉是幸

瑞林祥元記具

武齋洋行

本行開設天津 於茲二十餘年 自運各種洋貨 絨紗布匹綢緞 繡花屏風鏡額 磁銅料器珞藍 奇巧美術玩器 學界文房用品 旋行携帶等件 精工變身物料 定織各色帶氈 現又擴充樓房 極其寬闊高大 如蒙官商光顧 價值格外從廉 本行隨便入覽 電話一千三百七十四號 天津法租界 武齋洋行謹啟

督署兩等小學招生廣告

一宗旨 以合教官紳士民子弟為主不分省界
二地址 在督署後天緯路北
三學級 本校分高等初等兩級
四課程 高等 講經 國文 歷史 地理

格致 算術 手工 音樂 英語 體操 第三年第一初等 讀經 國文 算術 音樂 團畫
五年齡 學期酌添農業商業工業為隨意科任各學生認學一科 體操 第二年第一學期添歷史地理

高等以十四歲以下十一歲以上為合格
初等以八歲以上十一歲以下為合格
六學費 免收
七膳費 由本堂備午膳不收費
八書籍操衣

費 均自備
九資格 高等以能作短文為合格
初等以能識字能寫字為合格
十卒業 高等初等均以四年卒業
十一獎勵均遵 **部章**

高等生卒業最優等得獎廩生優等獎增生中等獎附生 初等由督帥及 提學司考試分數合格由本校發給卒業文憑准其升學
十二報名 由學生父兄偕同妥實保證人至天緯路北本校報名聽候傳考惟本人父兄不得作保證人

督署兩等女學招生廣告

一宗旨 以合教官紳士民女子為主不分省界
二地址 在督署後花園
三學級 本校分高等初等兩級
四課程 高等 講經 國文 歷史 地理

格致 算術 圖畫 女初等 讀經 國文 算術 音樂 女紅 圖
五年齡 以上為合格初等以七歲以下十一歲

上十一歲以下為合格
六學費 免收
七膳費 由本堂備午膳不收費
八書籍操衣費 均自備
九資格 高等以文為合格初等以能識字能寫字為合格
十卒業 高等初等均以四年畢業
十一報名 由學生父兄偕同妥實保證人至天緯路本校報名聽候傳考惟本人父兄不得作保證人

文為合格初等以能識字能寫字為合格
十卒業 高等初等均以四年畢業
十一報名 由學生父兄偕同妥實保證人至天緯路本校報名聽候傳考惟本人父兄不得作保證人

本局廣告

本局承辦印刷研究精良近益不惜重資延聘外洋著名工師添購新式機器精製雕刻銅版所有承印各種紙幣股票等件圖畫精巧色澤鮮明紙質堅緻屢蒙中外官商照顧頗如獎譽茲為推廣招徠起見自本年承印各項價目格外減讓以副官商雅意如蒙賜顧請至本局賬房面議可也

催繳甘賑捐冊廣告

查甘賑捐冊有三百餘分未經交回同人擬再展限二十日至十月底務望一律交齊是所至盼
官報局甘肅籌賑處謹啓

助柴鳴謝

啓者本堂收養孀孤年來人數增多不獨米糧用鉅而冬令燒柴尤為大宗茲承建造處陳建侯總辦惠助木柴二萬數千斤作炊爨之用黍谷回春不衣自煖似此樂善好施盡登報端用鳴謝悃
廣仁堂公啓

鳴謝助款

呂紳花翎候選道李公鴻翰謹遵故父李公鍾瑋遺命節省喪資以例銀三千兩捐助本堂經費業經收訖當此籌款困難承大紳善承先志慨濟多金實為好義可風同深感佩除由本堂詳請督憲奏獎外理合登報鳴謝以為樂善好施者勸
天津廣仁堂謹啟

天津南開私立第一中學堂招考新班學生

考期一在本年十二月初六日上午一在明年正月十八日下午

工商演說廣告

啓者十一月十八日晚八鐘至十一鐘仍借東宣講所內演說工商各項要理並請韓鏡湖先生演說電鍍五金法宋則久先生演說家庭工藝紀管泮先生演說飲食品與經濟衛生之關係務乞各工屆時惠臨入聽不取分文特先佈告
天津勸工陳列所謹啓